



MIWAR

Tou Seselwa

En nouvo Sesel En nouvo Frontyer - The next 50 years



NOU MISYON SE : INIFYE TOU STESLWA

« I byen ki nou annan en vizyon ki nou'n trase ansanm pour Nouvo Sesel. Me annou reste realis dan nou lanbisyon e dan nou lobzektif. Nou bezwen sirtou reste relevan avek letan ki nou pe viv ladan, avek bann nouvo sirkonstans, nouvo lekspektasyon, nouvo realite, nouvo defi ... Evolye koman en lafors politik dinamik. San abandonn nou prensip, me aksepte sanzman e fer sanzman, pour progre e byennet kontinnyel pep Seselwa »

« Nou bezwen osi reste konekte avek lepep. Tro souvan, serten i tonm dan letarzi. Zot kree zot pti zón konfor e obliy tou dimoun, tou keksoz otour zot. Zot vin dekonekte avek lepep. Napa pli gran danze ki sa, pli gran

menas pour nou Parti. Nou bezwen konbat sa bann latitud negativ. Si nou kontinnyen travay pour nou pep. Si nou kontinnyen reste konekte avek lepep ».

« Parti Lepep i pli solid ki zanmen avan. Nou annan

en bon lorganizasyon, ki pare pour nenport sitiasyon. Nou annan leksperyans dan lalit ek dan gouvèrnman. Nou touzour la pour lepep. Parti Lepep in prouve ki i kapab renouvle, anmenn nouvo lide. Anmenn sanz-

man. Parti Lepep i reprezant en listwar determinasyon ek sikse. I reprezant progre. I reprezant linite nasyonal. Parti Lepep i reprezant lespwar pour lavenir. Lespwar pour Nouvo Sesel ».

LEKEL NOU?

« Senkant-an pase ler Prezidan France Albert René ek son bann konpanyon revolisyonner ti plant paviyon SPUP lo later Sesel, zot ti senm en legrenn lespwar pour en meyer pei. En pei kot napa diskriminasyon baze lo kouler, lo klas sosyal, lo larzan. En pei kot i annan lazistis sosyal. En pei kot tou dimoun i egal. En pei lib, endepandan, fyer e dinny.

Senkant-an pase nou ti ouver en nouvo sapit – en sapit determinan – dan listwar nou pep. Sete komansman en lalit. En lalit asarne baze lo bann prensip fondamantal lazistis, laliberte, legalite, fraternite ek larmoni pour Sesel. Se sa bann prensip ki'n enspir nou tou dilon nou parkour, tou dilon nou konba. Se sa bann prensip ki'n gid tou nou aksyon pour en meyer lavenir pour nou pep. Se sa bann prensip ki'n anmenn nou ver sikse, progre ek devlopman ».

« Ler nou komemor sa levennman istorik, i bon ki nou zet en regar kot nou ti ete 50-an pase. E annou poz nou lekor en kestyon. Lekel sa parti ki'n anmenn nou kot nou ete ozordi?

Lekel sa parti ki'n lite e anmenn lendepandans pour Sesel? Lekel sa parti ek sa gouvènmàn ki'n eradik lapovrete, lenzistis, linyorans dan nou sosyete? Lekel sa parti ek gouvènmàn ki'n demokratiz ledikasyon Sesel? Lekel sa parti ek sa gouvènmàn ki'n anmenn en sistenm lasante modern e performan pour tou Seselwa? Lekel sa parti ek sa gouvènmàn ki'n konstri – e pe kontinnyen konstri – lozman pour nou pep? Lekel sa parti ek sa gouvènmàn ki'n anmenn progre pour Sesel?

Lalis lakonplisman pandan sa bann dernnyen deseni i long, i ris e i varye. Me larepons sa bann kestyon i enn-menn. Se nou Parti Lepep, eritye fyer e lezitim SPUP e SPPF. Se sanmenm sa Parti ki'n toultan annan lentere Seselwa a-ker. En Parti ki'n reste fidel anver son prensip, me en Parti ki kontinnyen evolye. En Parti ki aksepte sanzman ek defi. En Parti for e solid ki pe kontinnyen gid lepep ver Nouvo Sesel. Ver en nouvo frontyer. »



Produced, Published by the **PARTI LEPEP.**

Tel: 28 49 00 P.O.Box 1242, Victoria, Mahe, Seychelles. Printed By PRINTEC PRESS HOLDINGS, Mt Fleuri.